

**ACTA DA SESIÓN ORDINARIA, CELEBRADA POLO PLENO CORPORATIVO MUNICIPAL O DÍA VINTE E CINCO DE XANEIRO DE DOUS MIL DEZAOITO.**

En Paradela, a vinte e cinco de xaneiro de 2018

No Salón de Sesións da Casa Consistorial, sendo as trece horas e dous minutos, reúnese en primeira convocatoria a Corporación Municipal en sesión ordinaria, baixo a Presidencia do Alcalde, D. JOSÉ MANUEL MATO DÍAZ e coa asistencia dos Srs. Concelleiros.

- D<sup>a</sup> SONSOLES LÓPEZ IZQUIERDO
- D. GUILLERMO CASTRO GONZÁLEZ
- D. MARTÍN LÓPEZ LÓPEZ
- D<sup>a</sup> M<sup>a</sup> MONTSERRAT MULET SAR
- D<sup>a</sup> ANA BELÉN LÓPEZ ÁLVAREZ
- D. BENJAMÍN LÓPEZ MATO
- D. JESÚS PABLO LÓPEZ GONZÁLEZ

Non asiste D. MANUEL REGUEIRO LÓPEZ, xustificando a súa ausencia.

Asiste o Secretario-Interventor da Corporación, José López González, que da fe do acto.

A continuación procédese a coñecer dos asuntos incluídos na orde do día.

**1º.- APROBACIÓN, SE PROCEDE, DA ACTA CORRESPONDENTE Á SESIÓN ORDINARIA CELEBRADA O PASADO TRINTA DE NOVIEMBRE DE 2017.**

Polo Sr. Alcalde, que preside a sesión, procédese a preguntar aos demais membros da Corporación se teñen algo que obxectar á acta da sesión ordinaria celebrada polo Pleno o día 30 de novembro de 2017; das que as minutas foron distribuídas coa convocatoria, todo ao abeiro do disposto no art. 91 do Regulamento de Organización, Funcionamento e Réxime Xurídico das Entidades Locais.

Sometése a aprobación da acta da sesión ordinaria celebrada polo Pleno o día 30 de novembro de 2017. O resultado foi de aprobación pola unanimidade dos oito Concelleiros que asisten á sesión (seis do Grupo Municipal do Partido Popular e dous do Grupo Municipal do Partido Socialista), sendo nove o seu número legal de membros.

**2º. DACIÓN DE CONTA DAS RESOLUCIONS DE ALCALDÍA.**

Neste punto da orde do día, procedeuse a dar conta das distintas Resolucións de Alcaldía emitidas dende o derradeiro Pleno, postas a disposición dos concelleiros, xunto coa restante documentación sometida a exame plenario. (Dende o 2017-0212 ao 2017-0240 e dende o 2018-0001 ao 2018-0010).

O Pleno dase por enterado.

**3º.- APROBACIÓN, SE PROCEDE, DA MOCIÓN PRESENTADA POLO GRUPO MUNICIPAL DO PARTIDO SOCIALISTA PARA ESTABLECER UN**

## **SISTEMA PÚBLICO DE PENSIÓNS CON MAIOR CAPACIDADE DE REDISTRIBUCIÓN E REDUCIÓN DAS DESIGUALDADES.**

Por parte da Voceira do grupo Municipal Socialista, procedeuse a lectura da Moción para establecer un sistema público de pensións con maior capacidade de redistribución e redución das desigualdades, **con entrada no Rexistro do Concello en data 19 de xaneiro de 2018 (Rex. Núm. 66), co seguinte tenor literal**

*”D<sup>a</sup>. SONSOLES LÓPEZ IZQUIERDO, na súa condición de voceira do Grupo Socialista no Concello de PARADELA comparece e como mellor en Dereito proceda DI:*

*Que ó abeiro do disposto nos artigos 97 da Lei 5/1997, do 22 de xullo, Lei de Administración Local de Galicia, 91,4 e 97 do Real Decreto 2568/1986, do 28 de novembro, polo que se aproba o Regulamento de Organización, Funcionamento e Réxime Xurídico das Entidades Locais, e 46,2 da Lei 11/1999, do 21 de abril, Lei de modificación da Lei Reguladora de Bases do Réxime Local e outras medidas, presenta á consideración do Pleno da Corporación Municipal a seguinte:*

### **MOCIÓN PARA ESTABLECER UN SISTEMA PÚBLICO DE PENSIÓNS CON MAIOR CAPACIDADE DE REDISTRIBUCIÓN E REDUCIÓN DAS DESIGUALDADES.**

#### **EXPOSICIÓN DE MOTIVOS**

*O Sistema Público de Pensións constitúe a política pública con maior capacidade de redistribución e redución das desigualdades (o 46%).*

*As políticas do PP representan unha seria ameaza para o sistema público de pensións. Coas súas políticas de emprego o Goberno de Rajoy puxo en perigo a sustentabilidade económica das pensións, que entraron nun período de déficits constantes e crecentes; e co novo mecanismo de revalorización, que se desvincula do poder adquisitivo e co factor de sustentabilidade, que axusta o importe da pensión en función da esperanza de vida, condénase aos pensionistas a un progresivo empobrecemento. E todo iso, fixérono mediante a imposición, sen diálogo social e rompendo unilateralmente o consenso do Pacto de Toledo. Con estas políticas o PP está a preparar o camiño para os Fondos de Pensións privados, en detrimento do Sistema Público de Seguridade Social.*

*Os resultados desta política están á vista: progresiva perda de poder adquisitivo das pensións, sensación de incerteza nos actuais xubilados sobre se o Estado será capaz de pagar as súas pensións nos próximos anos, sentimento de inxustiza naqueles que contribúen ao sistema pero dubidan de que este lles poida proporcionar unha pensión digna nun futuro a 10 ou 20 anos vista, e desesperanza case absoluta por parte da mocidade en que algún día poidan contribuír e ser protexidos polo sistema.*

*O PP está laminando o Sistema Público de Pensións sometendo a un espolio permanente ao Fondo de Reserva da Seguridade Social.*

*O déficit foi compensado por retiradas masivas do Fondo de Reserva que, de contar con 66.815 millóns de euros a finais de 2011, sitúase, no día de hoxe, en 8.095 millóns de euros, e que se non se esgotou totalmente foi como consecuencia do préstamo de 10.192 millóns de euros do Estado á Seguridade Social contido na Lei de Orzamentos Xerais do Estado de 2017. A iso hai que engadir as cantidades retiradas do Fondo de Mutuas, por importe de 8.621 millóns de euros nestes anos. En definitiva, necesitáronse fondos por importe de 93.251 millóns de euros adicionais ás cotizacións para poder facer fronte ao pago das pensións no período 2012 - 2017. O ano 2018 comezou na mesma liña e o PP, no canto de expor medidas serias no marco do Pacto de Toledo e o Diálogo Social, decidiu seguir endebedando á Seguridade Social cun crédito de 15.000 millóns de euros.*

*O Fondo de Reserva, xurdido da reforma da estrutura financeira da Seguridade Social*

levada a cabo polos gobernos socialistas en 1989 e recolleito posteriormente como unha recomendación do Pacto de Toledo, estaba previsto para ser usado cando xurdisen as maiores tensións xeracionais sobre o Sistema, en torno ao ano 2023. De non ser utilizado, o Fondo tería hoxe máis de 90.000 millóns, mesmo sen novas achegas, só en base á súa propia rendibilidade. En cambio, de seguir con este ritmo de gasto, a nosa hucha das pensións quedará totalmente baleira no ano 2018. É dicir, vaise a esgotar 10 anos antes do previsto.

Este escenario pon en risco a situación financeira da Seguridade Social e en consecuencia, a garantía non só das pensións actuais senón tamén, e especialmente, das pensións futuras. Por iso é imprescindible adoptar medidas que dean estabilidade ao Sistema.

No PSOE consideramos que o dereito ás pensións e o acceso ao Sistema de Seguridade Social debe considerarse un dereito constitucional e ser incorporado como tal na reforma da Carta Magna que propomos. Para iso, expomos medidas destinadas a garantir o futuro do Sistema Público de Pensións: recuperando o Pacto de Toledo e o diálogo social; aprobando un novo Estatuto dos Traballadores que promova dereitos laborais e emprego de calidade; e establecendo unha fonte complementaria de financiamento das pensións a cargo do PGE, como na maioría dos países da nosa contorna.

Por estas razóns o PSOE defende un novo modelo para reequilibrar o sistema de pensións, mantendo o gasto, racionalizando outras partidas e incrementando os ingresos do sistema.

Por todo iso, o Grupo Municipal Socialista do Concello de Paradela presenta para a súa consideración e aceptación polo Pleno Municipal a seguinte MOCIÓN instando o Goberno de España a:

1. Volver ao consenso de 2011 derogando todos os cambios legais introducidos ao longo da lexislatura 2011-2015: a regulación da xubilación anticipada do RDL 5/2013 e, de forma íntegra, a Lei 23/2013, reguladora do Factor de Sustentabilidade e do Índice de Revalorización do Sistema de Pensións da Seguridade Social.

2. Garantir o poder adquisitivo das pensións, recuperando a actualización das mesmas conforme ao IPC.

3. Eliminar o factor de sustentabilidade establecido polo PP na Lei 23/2013, que reducirá as pensións de xubilación en función da esperanza de vida da cohorte correspondente a partir do 1 de xaneiro de 2019.

4. Racionalizar os gastos do sistema, desprazando aos Orzamentos Xerais do Estado 2018 aqueles que non corresponden a prestacións, como os seguintes gastos entre outros:

a) As medidas de fomento do emprego (reducións de cotas, tarifas planas, etc.). Se se considera necesario manter algunha debería ser pola vía de bonificacións e a cargo do PGE

b) Os gastos de xestión das Entidades Administrativas da Seguridade Social, do mesmo xeito que se fai co resto de organismos públicos.

5. Incrementar os ingresos do sistema:

a) Complementando o financiamento da Seguridade Social, entre outras medidas, con ingresos procedentes de impostos destinados anualmente a completar os ingresos por cotizacións ata que estes vólvanse a equilibrar dentro do sistema, por exemplo novos impostos extraordinarios á banca e ás transaccións financeiras. Pensamos que se toda a sociedade española contribuíu ao rescate das entidades financeiras, este imposto ha de servir para contribuír ao rescate do sistema público de pensións

b) Intensificando a loita contra o emprego irregular e a fraude á Seguridade Social.

6. Mellorar a natureza protectora do sistema modernizando a xestión do Fondo de Reserva a través dunha mellora da súa regulación, recuperando o establecemento de límites á disposición de fondos con carácter anual.

7. Adoptar medidas específicas para ir eliminando progresivamente a brecha próxima ao 40% existente entre a contía das pensións dos homes e das mulleres (déficit de xénero):



## Concello de Paradela

- a) *Aprobación dunha Lei de Igualdade Laboral co fin de eliminar a brecha salarial, e por tanto de cotizacións, que acaba derivando en pensións máis baixas.*
- b) *Recuperar a iniciativa legislativa socialista, incluída na Lei 27/2011 de incrementar a pensión de viuvez para maiores de 65 anos que non reciban outra pensión pública ata alcanzar o 60% da base reguladora, medida que afecta de maneira maioritaria ás mulleres.*

*8. Introducir no Pacto de Toledo, un novo principio de “reequilibrio orzamentario”, un concepto que implica unha procura constante de racionalización de gastos e de axuste de ingresos cada ano, e que terá efectos no medio prazo e ata finais dos anos 40 do século XXI.*

*Lugo, 18 de xaneiro de 2018*

*Asdo.: Sonsoles López Izquierdo*

*Voceira socialista do Concello de Paradela”.*

Dona Sonsoles López Izquierdo, voceira do Grupo Municipal Socialista, di que se trata dunha moción bastante ambiciosa, que toca bastantes paus, e que o problema do sistema de pensións é unha realidade que está aí, que non é un invento do Partido Socialista que incluso o Fondo Monetario Internacional se está a posicionar, polo que considera que hai que posicionarse neste asunto.

Por parte do Tenente Alcalde, Martín López López dise que aceptarían a Moción incluíndo a emenda baseada no seguinte argumentario.

Co Goberno socialista a Seguridade Social perdeu máis de tres millóns de afiliados. Loxicamente esta circunstancia produciu o afundimento dos ingresos. O superávit pasou do +1,31% do PIB en 2008 ao -0,04% do PIB no 2011. Isto supuxo un “desplome” no resultado da Seguridade Social, próximo aos 15.000 millóns (o 1,4 % do PIB).

Os datos, desde a chegada do Goberno do Partido Popular, supoñen unha mellora de todos os indicadores, que pon de manifesto unha evolución positiva en materia de emprego, afiliación, número e contía de prestacións, incremento de ingresos do Sistema e crecemento e control do gasto. En 2017 o déficit sitúase nun 1,62% do PIB e en 2018 farao nun 1,5% do PIB. Estes datos son os que representan máis claramente o cambio de tendencia no sistema da Seguridade Social.

O poder adquisitivo das pensións desde 2014 ata o peche de 2017, que son os anos nos que estivo en vigor o IRP, mantívose á vez que se incrementou o gasto de pensións como demostran os datos de aumento do número de pensións e da súa contía media.

O Goberno do Partido Popular utilizou o Fondo de Reserva para preservar os dereitos dos pensionistas e non ao contrario. É dicir, utilizouse, exclusivamente, nos termos e condicións previstos pola lei para garantir o pago puntual e preciso das pensións contributivas.

A solución financeira que está a adoptar o Goberno do Partido Popular é, definitivamente a única que enfronta o déficit, como se demostrou no ano 2017, e faino a partir do incremento do emprego.

O recurso utilizado polo Goberno do Partido Popular a través da imposición xeral do Estado e instrumentalizado co préstamo á Seguridade Social é a mellor na situación actual. O Goberno tomou a mellor opción á espera dun acordo dos grandes partidos respecto do financiamento do déficit da Seguridade Social que chegará unha vez finalicen os traballos da Comisión Permanente do Pacto de Toledo.



Para o PP a participación e o dialogo social son a pedra angular da Seguridade Social e, en concreto, do futuro das pensións porque lexitima as decisións e cambios legislativos que se tomaron no pasado e tomaranse no futuro. Así: o pasado 11 de outubro aprobouse unha Lei coa práctica unanimidade de ambas as Cámaras; dende o inicio desta legislatura e ata a data, constituíronse dúas mesas co obxectivo de abordar os problemas que incumben ao Sistema de Seguridade Social e sempre mantivo e manterá que calquera estratexia de reforma, tanto se se opta polo control do gasto coma se se aposta por incrementar os ingresos ha de ser unha decisión froito do consenso que se acorde na Comisión Permanente do Pacto de Toledo.

Co obxectivo de reforzar a equidade do sistema, o Grupo Parlamentario Popular trasladou ao Pacto de Toledo que se estude que aqueles traballadores que máis contribuíron ao sistema –os que cotizaron polo menos 38 anos e medio- e que se xubilen á idade ordinaria poidan elixir voluntariamente o modo de cálculo actualmente vixente por lei ou a alternativa dunha nova fórmula que contemple toda a súa vida laboral se con iso vise mellorada a contía da súa pensión. Esta medida reforza a equidade no trato dos traballadores e a contributividade do sistema de Seguridade Social ao permitir que os traballadores con longas carreiras de cotización poidan optar de maneira voluntaria pola mellor alternativa. Á súa vez, incentiva a prolongación da vida activa porque para iso é requisito alcanzar a idade ordinaria de xubilación.

Dona Sonsoles López Izquierdo, voceira do Grupo Municipal Socialista, di que non aceptan a emenda, e os datos que se acaban de relatar non son reais, son os datos nin sequera do goberno, senón do PP. Cando o PP chegou ao poder había sesenta e seis mil millóns de euros na caixa das pensións e agora só oito mil millóns, recuperar a situación levará un século, porque o PP non pode escudarse como que non saben o que fan, e vestirse con pel de cordeiro, porque o saben perfectamente, e non é outra cousa que desmantelar todos os servizos públicos, é o que se está a facer é avisarnos non unha opción de que se fagan plans de pensións polo que sexan claros e digan claramente sendo consecuentes coas políticas conservadoras e que creen na privatización eo PP cree niso en todos os ámbitos.

O Sr. Alcalde di que quere facer dúas matizacións, por unha banda a xente sabe como quedou o fondo do pensións co goberno socialista de Zapatero e co goberno do PP, porque cara a prensa todo isto está moi ben pero é o PP o que resolve os problemas; por outra banda que este debate é un pouco estéril, e deben ser os técnicos os que deben decidir ao respecto.

Dona Sonsoles López Izquierdo, voceira do Grupo Municipal Socialista, di que se o PP non son capaces de facerse cargo das cifras reais e negan a evidencia pois non hai nada que facer.

Rematado o intenso debate, procedeuse a votar a Moción, que resultou rexeitada, pola maioría absoluta cos votos en contra dos seis concelleiros do Grupo Municipal Popular polo voto a favor dos dous membros do Grupo Municipal Socialista, sendo nove o número legal de membros.

#### **4º.- ROGOS E PREGUNTAS.**

Non se presentaron formalmente preguntas en rogos por escrito, se ben dase a posibilidade de formulalos neste intre.

Por parte de Dona Sonsoles López, Voceira do Grupo Municipal Socialista roga

que se arranxe a estrada de Riocabo de Cima que vai de arriba a abaixo.

Por parte do Grupo de goberno, respóntase que xa está arranxado ese tema e xa se fixeron as medicións para proceder ao seu arranxo.

Asemade, Dona Sonsoles López Izquierdo, Voceira do Grupo Municipal Socialista, di que fará unha proposta por escrito, aínda que xa o adianta neste intre, para pasar a celebración da Feira de San Isidro ao fin de semana, poñéndose de acordo con Sarria para que non coincida no mesmo fin de semana.

O Sr. Alcalde di que non é partidario destes cambios, pero que se estudiará ese asunto.

**E non habendo máis asuntos que tratar, o Presidente levantou a sesión sendo as trece horas e vinte e cinco minutos do vinte e cinco de xaneiro de dous mil dezaoito, exténdose a presente acta da que coma Secretario-Interventor dou fe.**

**Vº e prace**

**O Alcalde**

**Asdo.: José Manuel Mato Díaz**

**O Secretario-Interventor**

**Asdo.: José López González**

**Documento asinado electronicamente á marxe**